

تورک پوردی

نومرو ۲

تشرین ثانی ۱۳۴۰

جلد ۱

دولت ترک ماهیتی

و
ملی آدی

تاریخچر اسکیدن بری بر آغیز اولارق برساجوقی دولتندن بحث ایدرلر .
بوحال کونمزده قادار دوام ایده کمشدر . برسلجوقی دولتی تصور ایتمه لری تاریخچیلرک
بویوک برغفلتیدر . علمی بر خطا در . بو غفلت و خطا ایتمه یورمش کبی صوکرده ده
بر عثمانلی دولتندن بحث ایدلشدر . شرقده ، غربده بوتون ذهنلر بو تلقینلر آلتنده
قالمشدر . بوذهنیته تربیه کورمش ، یاشامش تاریخچیلرک و اوتاریخچلرک تربیه
ایتدکلری دماغلرک باشقه درلو دوشونمک امکانی اولامایه جنی طبعیدر . بنده
بو تلقین آلتنده ایدم .

مصرده تورک تاریخچی ایله مشغول اولور ایکن اسمنی بو کون خاطر لایامادیغم ،
نوط آلدیغم حالده بو کون نوطلرینی اوراقم آراسنده ده بولامادیغم ائرده سلجوقیلرک صوک
پادشاهنک ذریتی اولمادیغندن عثمان غازینک کندی یرینه کچیرلمسنی وصیت ایتدیکنی ،
وصیتی اوزرینه وفاتنده قارا عثمانک مولانا جلال الدین رومینک ایله کنديسنه تاج
کیدیر یلهرک [۱] تخته کچیریلدیکنی او قوددیغم زمان در حال خاطریمه « عثمانک چیقارلیدی
تختک سلجوق تختی ، پادشاهلغک برسلاله دن دیگر برسلاله یه همده اختلال و جبر
ایله دکل مشروع بر صورتده کچمش اولدینی » کلدی . بو فکر دماغمده بر نور
دوغار کبی دوغدی . یاقلادیغم بومهم نقطه اوزرنده کونلرجه اعمال فکر ایتدم .
بونک باشقه دلیل وسببلر ایله ده بویله ودوغرو اولدیغنه قناعت حاصل ایتدم . بویانک
ایشیق مضکره می ایجه آیدینلادی . پادشاهلغک بر خاندان دن دیگرینه کچمسی بنی دولتک
عینی دولت اولدینی نتیجه و قرارینه وارد یردی . بو حالده شیمدی یه قدر ظن اولوندیگی کبی
برسلجوقی دولتی ، برده عثمانلی دولتی اولمادیگی ، بوتعبیر و موجودیتلرک یک یا کلس
[۱] مولانا جلال الدینک وفاقی تاریخی بو استقلال تاریخندن چوق اول اولدیغندن بو
مهراسمی اداره ایدن چلی باشقه بر ذات اولقی لازمدر . و یاخود بو خبر دوغرو دکلدیر .

اولدینی بجه میدانہ چیقدی . دیمک شیمیدی به قدر تاریخچیلر یا کاش اولارق بودولتی ایکی دولته آیرمشلر، هرایکی خاندانی آیری آیری برردولت فرض ایتمشلردر . بکتاشی غننه لرندده سالچوقلیلرک صوگ پادشاهی علاءالدینک اوغلواولمدینی، بوزاتک مولانا جلال الدینی کندیسنه آتا یاپدینی، ذریتسزلکدن کدرلی اولوب بر بویوک مجلس طویلایه رق دولتک آتیسنک مذا کره ایدلدیکی روایت اولونمقده وبوروایتلر آراسنده حاجی بکتاش ولی ایله، عثمانک قاینا تاسی شیخ اده بالینکده آدی کچمکدهدر .

ینه دوشوندیم، باقدم که آیرک آیری ایکی دولت فرض ایدلمش اولان بودولتده طوپراق بر وعینی، ملت بر وعینیدر . بر دولت علمی بر صورتده تعریف ایدلدیکی وقت اونده بر ملتله برده طوپراق اولماسی لازمدر . اکر بو طوپراق وملت عینی اولورسه اودولت طبیعتیله بر دولتدر . یوقاریکی معلومات دوغرو اولماسه دخی بوملت و طوپراق مسئلهستک برلکی دولتک برلکی حقنده کافی دکلدر .

طوپراق بریدیک . واقعا سالچوق خاندانی زماننده دولت شرقده باشلامش، دولتک « مرکز ثقلتی » شرقده، اورتا آسیا و بالخاصه ایران و مہ زوپوتامیا اولمش ایدی . صوکره دولت غریبه دوغرو بویومش، سالچوق خاندانک صوگ مهم بر دوررسنده مرکز ثقلت آنادولویہ کچمشد . عثمانلی سلالهسی زماننده ایسه دولت آنادولوده، یعنی سالچوقلر سلالهسنک صوگ مرکز ثقلتی اولان یرده باشلامش، دولت غریبه درغرو بویوبوب، مرکز ثقلتی روم ایلی یه کچمشد . بوسلاله نیک صوگ دوررسنده دولت روم ایلیدن آل چکه چکه نهایت دولتک مرکز ثقلتی ینه آنادولویہ رجعت ایتمشد . بو بر حادثهدر . بوکی حدود تموجلری هر دولتده اولدینی کی بودولتده اولمشد و نهایت بو تموجلر موازنه و سکوتی بولدینی کی بودولتده بولمشد .

شو تاریخی حادثه بزه بویکی سلاله آدی آلتند عظمی برسیاسی وارلق حالده یکانه بر دولتک موجودیتی و بودولتک کووده و کوکنک آنادولو اولوب ایلک دورده صاغنده بر استطالهسی اولدینی حقنده بر فکر ویرمکدهدر .

ينه بو حادته بر صاغ قناد يا خود داها علمى بر تعبيله صاعده بر « بزود و بود »
حائنده اولان بو استطاله يي صوكره غيب ايتديكى ، بوندن صكره صولده بر بزود و بود
يا يوب براز صوكره اونى ده يتوردى كنى ، نهايت اصيل كووده سيله ، كوكيله قالدى كنى
او كرتمكده در .

ينه كور و ليوركه بود دولت جناح لر نده استقرار ياپاماشدر . صاعده قورولش ،
قورولديغى برده طو تو ناميه رق آنادولوده دورا يلوب قالمش ؛ نهايت صوله طاشمش ،
اوراده ده طو تو ناما يوب ينه آنادولويه قاچمش ، اوراده آرسلان كى ير نده دورمش ،
حتى يالكز بوقادارله قالماش ، آنادولوده تازه حيات و بوتون زند كيسى بولمشدر .
نهن بوراده طو تو نمشدر ؟ - بونى طوپراق برلكنك اثباتى بختنده كوستره جكم .
ديتك بود دولتك تملى ، طبيعى يرى آنادولودر . او كا حيات نسغى و ير ن طوپراق
آنادولو طوپراغيدر . بو طبيعى حادته مهم بر عبرت و درسدر كه بر چوق حادته لرى
واستقبالى ايضاحه يارار . ايسته شو آنادولو ايله طوپراق سالچوقلى و عثمانيده ده بر در .
ملت برديدك . داها سالچوقليلر دولترينى قورمادن اول توركلر عباسلى خليفه لر
زماننده اوروق اوروق مه زو بوتاميا ، عراق شرق و شرقى جنوبى آنادولويه ، آطنيه
كشلىر و يرلشمشدر . عباسيلرك والى و قوماندانلرينك چوغى تورك ايدى .
بومامورلر ايله - معيت و عسكر اولارق - توركلر بورالره كليورلردى . يعنى ۱۲
عصر اول بورالره تورك هجرت و يرله شمه سى باشلامشدى . سالچوقليلر تشكىل
ايدوب بورالره دوغرى كلكلىرى وقت ايسه توركلر جوشغون بر ايرمق ، حتى
بر طوفان سيلى كى كلوب مه زو بوتاميا ، عراق ، سوريه و آنادولويه يرله شمشلر ،
بو اولكه لرك اصيل يرلى آهالى سى اولمشلر ، بورالره تورك سيماسنى و يرمشلدر .
يعنى دوقوز عصر دن برى بو يرلر عادتاً كاملاً توركدر . عثمانلى سلاله سى زماننده
يكنى بر ملت كله مشدر . بونلرك زماننده تورك هجرتى ده خفيفله مش [آتته نوته]
بر شكلده اولمشدر كه اهل ايديله بيلير . ايدلمه ده كلنلرينه توركدرلر و اولكيلر كى
عنى اوغوزلر ، يعنى توركمنلر درلر . بر قاعده كى ديمه مزه امكان واردر كه
آنادولويه كلن توركلر سالچوقلى خاندانى زماننده كلن توركدر . عثمانلى سلاله سيله

برابر مهاجرت اولماشدر . حتی عثمانلی سلاله سی اوروقنك ده اك بويوك قسمی
 سالجوق خاندا ئی زماننده بويرلره كلشدر . بو اوروقنك صوك زمانده كلن و عثمانلی
 سلاله سنی ايجندن چيقاران قسمی ايسه كوچوك بر قسم اولوب دورت يوز چادير
 خلقتدن عبارتدر . « برعشیرتدن بر جهانگیر دولت چيقاردق ! » سوزی نامق
 كلك شاعرانه سوزيدر . تفسير ياكلس ياپيلور . او ، برخاندا ئی قصد ايتمش اولسه
 كر كدر . ياخودده بو ، برشاعر خرافه سيدر . يوقسه آهالی تورك اولماسه دورت
 يوز دكل ، دورت بيك حتی داها فضله سی ده دولت قوراما زلردی . ديمك هر
 هانكي بر نقطه دن مطالعه ايتسه ك بودولتی تشكيل ایدن ملت عینی بر ملتدر .

بوراده شونی ده سويله مه دن كچه مك لازمدر . توركلرك مه زوپوتاميا ، عراق
 و آنادولويه كله لری ۹ ویا ۱۲ عصر اولندن ده دكلدر . ميلاددن ۴.۰۰۰ يیل
 اولندن بری یعنی تاريخك ضبط ایده بيلديكي زماندن بری بويرلرك وقافقاسيانك
 آهالينك تورانلیلر اولديغنی « دومورغان » كبی تاريخ و آثار عتيقه علمی عالمده
 اك اهلیتدار صايلان ذاتلر سويله مكده درلر . حقیقه بورادلرده اوراتو ، نلام ،
 سومهر ، توبال خيت ، قوماق كبی تورانی ملتلرك و دولتلرينك وجودینی بيلوروز .
 سالجوقلیلره كلنجيه قادار بوتوركرك دفعه لرجه ايران ، آثوری ، مصر فرعونلری ،
 ساحلرنده يونانلیلر ، ماكدونیالی بويوك اسكندر ، رومالیلر و بیزانسیلیلر كبی
 ملت و دولتلرك استیلالری آلتنه دوشمشلر ، ديل ، دین و حرثجه برچوق استحاله لر
 اوغرامشدر . سالجوقلیلر كلكلری وقت بونلری خریستیان و بیزانس حرنی
 محكومی بولمشلردی . هر حالده تاريخده بعضی ایزلر حائده كوروپورزكه بیزانس
 اوردولرند توركلری بولوپورز . بونلرك بر قسمی پچه نه كلر ، خازارلر كبی طیشاردن
 ايسه ده بر قسمی ده بیزانس حكمی آلتنده كی توركلردندر . بیزانسك بولغارلره قارشی
 آنادولودن برتورك اوروقنی روم ایلنه كچروب يرلشديرمه سی ده بو حقیقتی تنویر
 ایدر . بوسیلردن دولای اولاجقدر كه آنادولوده توركلك سالجوقلیلرك باشلانغچيله
 بويوك بر قولایاقله عمومیه شیورمشدر . سالجوقلیلر ايله يكي و بك اساسلی بر تورك
 هجرتی اوش ، آنادولو باشدن باشه و چارچابوق ، « رنه غروسه » نك [آسیا

تاریخی ، ۱۹۲۲ م . ، پارس] قولاندیغی تعبیر کی یکی بر تورستان ، یکی بر توران اولمشدر . ذاتاً بیرانس بر عرق افاده ایتمز . عرق و ملیت جهتیله بابل قوله سی حالنده بر دولتمدر . بوده بو حرکتی قولایلاشدر ان عاملردن اولمش اولسه کر کدر . قولایجه و چارچابوق تور کلشمه نك ایکی سببی داها واردر ؛ بیرانسك اداره سز لکندن ، ظلملردن آهالی اوتیه بری یه هجرت ایتمشدر دی . دیگر بر سببده سالچوقلیلرک استیلاسی زماننده بیرانسلیلرک بویوک کتله لر ایله قاجیشمه لیدر . بوسبیلرله آنادولو اهالی یه محتاجدر . بوده بویرلشمه یی قولایلاشدر میمشدر . دیگر بر مهم سبب وارکه اوده محیطه ، اقلیمه عائر شرطلردر . آنادولو معلوم اولدیغی اوزره شمالنده پونت ، جنوبنده طوروس داغلریله و غربنده کی دیگر بعضی داغلر ایله اورتاده بر یایلا تشکیل ایدر . بوضورتله قیلردن ویایلادن عبارت اولارق ایکی قسمه آیریلیر . بو ایکی قسمك اقلیمی ، هواسی ، حیوانات و نباتاتی ، زراعتی ، حاصلی حیات شرطلرنجه بویوک فرقلری واردر . اورتاده کی یایلا تورکک اورتا آسیاده کی یایلاسنه و حیات شرطلرینه او یغون کلشدر . بو او یغونلق اونك حتی اورتا آسیاده کی کی قویون سورولریله حتی تیتدن بری کتیر دکلی تفتیک کچیلریله برابر یرلشمه سنده مهم عامل اولمشدر . حقیقه بویایلا آنادولونك قیلردن چوق اول و تمامیه تورکله شمشدر . بوراده اسطراداً سویلرم که تورکیه یه عصر لردن بری آنادولونك کووده اولسی ، تورکیه نك صاغنی صولنی غیب ایدوب نهایت آنادولوده قالماسی یه بو محیطی عامللر ایله ایضاح اولونا بیلیر .

حاصلی بویرلرک آصیل اهالیسی بر طاقم یابانچی استیلالرله تورکلکدن چالمنش ایکن سالچوقلیلر ایله یه تورکلک جهاننه صوقولمشدر . یعنی آصیلرینه رجعت ایتمشدر

دیلمک طوپراق بر ، ملتده بر ، او حالده دولتده بردر . یعنی بر دولت واردر که بونده ایکی سلطنت سالاه سی کلوب کچمشدر .

حاصلی پک اسکیدن بری تورکلرله مسکون اولان بو طوپراقده سالچوقلی تورکلرک تشکیل ایتدکلی و اونلردن عثمانلی تورکلرینه کچن بر دولت واردر . عثمانلی سالاه سی

زمانده بونک « دولت علیه عثمانیه » « عثمانلی دولتی » دیه آیری بردولت اولدیغنده عناد ایدلمشدر .

بوعنادک برقاچ سببی وارددر . برنجیسی تورکلرده قورولان دولتلره ، حتی اوروقلره اونلرک پادشاهلرینک ، باشلرینک ویا اونلرک عائله لرینک آدلرینک آد اوله رق ویرلمسک عادت اولماسیدر . همان بوتون تورک دولتلری بوصورته آد آلمشدر . سالجوقیلر ، عثمانیلرده بویله در . ایکنجیسی سالجوق خاندانی سونوب یرینه عثمان خاندانی کجدیکی وقت دولت طوائف ملوک حالده برتقسیمه اوغرا مشدی . بونلرک هر بری سالجوقیلرک وارئی اولمق دعواسنده ایدی . بودعوایی قیرمق ایچون عثمانیلر بکی بردولت یعنی عثمانلی دولتی تشکیل ایتدکلرینی ایلری سوریورلردی . بوکا برده بر خاندانک یکیدن بردولت قورمق شرفی حائر اولمق ، سالجوق خاندانی چکمه مک هوسی ده طبیعتیه انضمام ایدیوردی . بوسبيله هر شیئی ، هر شیئک آدینی ده کیشدیریورلردی .

حالبوکه تاریخک بزه کوستردیکی کی فرانسه ده ، آلمانیا ده ، روسیه ده اختلاللر وسائر صورتلره برسلطنت خاندانی سونمش یرینه بکی برسالاله کچمشدر . بو حال دولتلر حیاتنده بوتون دنیا ده طبیعی برشیدر . تاریخ هر صحیفه سنده بونی کوستر . مثلاً فرانسه ده بوربون ، اورله ثان خاندانلری ده کیشیور ، فقط دولت ده کیشمه یور ، فرانسه دایما قالیوردی و بودولتک آدی دایما فرانسه ایدی . بزده ده بو ، تمامیه بویله اولمشدر . تورکیه دولته ایلک سالاله اولان سالجوقیلرک صوک پادشاهی سلطان علاءالدینک وفاتیه سلطنت عثمان غازی یه کچمشدر . همده بوانتقال باشقه یرلرده اولدیگی کی براختلال نتیجه سی دکل ، مشروع صورتده اولمشدر . چونکه سلطان علاءالدین وفاتندن اول سلطنتک عثمان غازی یه کچمسی وصیت ایتمشدر . دولتک رجالی ده بونی مناسب کورمشلردر . بو وصیت طوتولمش ، بوتون رجال طوبلانمش ، مولانا جلال الدین رومینک حضوریه عثمان غازی یه قونیه ده تاج کیدرلمشدر . همده داها مهمی بوایشک اوغوز تورده سنه تبعیتله یاپیلمش اولماسیدر . برنجی علاءالدین کیقباد بختنده کوره جکمز اوغوز تورده سنی تصویر ایدن شعرده .

شويله بر مصراع واردر . « ديدى قايي چونكه صوكره خان اولاً » سالچوقايلرك زمانده قايلر ۲۴ بويك اك معتبرى اولوب پادشاهك صاغنده اوطورورلردى . شيمدى بومطالعات بزه قوى صورته اثبات ايدر كه بودولت بر دولتر . آلتى عصرلق دكل تقريباً ۹۰۰ يىللق بر دولتر .

متار كه نك ايلك ايلرنده يعنى بش يىل قادار اول آقشام غزته سنده يونانيلرك وار منيلرك كويا تاريخي دليلر ايله - كه هپسى ساخته وتاريخي تحريفدر - يورد مزه تصاحب ادعاليته قارشى بودولتك عثمانلى دولتي اوليوب توركيه اولديغنى ، ۶۰۰ يىللق بر دولت اوليوب ۹۰۰ يىللق بر سياسى موجوديت بولنديغنى دليلر ايله مطالعه ايدر بر مقاله نشر ايتمش ايدم . عيني زمانده اووقت استانبولده آجيلوب آز عمرى اولمش اولان « مجلس مبعوثان » كرسينده ده بونلرى سويله مش ايدم . سالچوق و عثمانلى دولترى آنده ايكي دولت موجود اوليوب بونلرك بر دولت اولديغى وبو دولته سالچوقلى و عثمانلى آنده ايكي سلطنت خاندانى بولنديغنى حقه ده كي ادعاه اووقته قادار هيچ يازما مش وايشيدلما مش ايدى . تاريخ ايله مشغول بعضى ذاتلر بيله اووقت شفاهى صورته بوفكرمه اعتراض ايتديلر ؛ فقط اعتراضلرني ضعيف كورمشدم . دعواه لينده كي دليللرك ايسه قوتى آشكاردى . ظنمجه بوكون بوكا علمى صورته اعتراض ايديله مز . اكر اعتراض ايديليرسه بوكونكي جمهوريتك ده آيرى بر دولت اولديغنى قبول ايتك ايجاب ايده جكدر . بويه بر دعوايه ايسه بوكون هر كس كوله ر بش ييلدن برى بوفكرلك يرقازانديغنى ، ارتق افكار عموميه يابانجى و غير طبعى كله مكده اولديغى كورولمكده در .

*

دولتك برلكنى اثباتدن صوكره آدينى قويمق احتياجي واردر . عجا بودولتك آدى ندر ؟ اسكيلى كى دولت سلجوقيه ، دولت عثمانيه دينه مز . بونلر برر سلاله آيدر . عثمانلى سلاله سى زمانده اناطولى ده كي توركلر اسكى تورك عادتى ، موجبنجه - عثمانلى ، عثمانلى توركى آدينى آلشردى . وبوتعيرد وعمرودر . آنجق بوكون بوسلاله ده بيتديكندن ينه اسكى تورك عادتى موجبنجه عثمانلى توركى آدى ده يتمشدر . بوكون بوآد نه اوله بيلير ؟

اولا - ملتہ نسبتہ تورك دولتی دینہ سی خاطرہ کلیر ؛ فقط بوآد موافق اولاماز. چونکہ تورك دولتی دینجہ دنیاده بوتون تورکلرک دولتی آکلاشیلابیلیر. کذا تاریخده موجود بوتون تورك دولتلریله قارشیدیریلاییلیر. تورك ملتی برانکلیر، بفرانسز، بروس، برآلمان ملتی کی دکلدرکه اونلر کی تاریخده ووبوکون آنجق بر دولت اولسون. هرملتک یالکز بر دولتی اولور. تاریخه کوره بو عادتاً بر قاعده وقانوندر. بونک یالکز بر استثناسی واردر. اوده تورکدر. تورك اولیه شانلی بر ملتدرکه، کوچوکلرینی صایما، ۵۰ قادار دولت تشکیل ایتشدر. بوقدرت، بوتشکیل، تأسیس ویاپیلمه قابیلیتی هیچ بر ملتہ نصیب اولاماشدر. تورك دولتی تعبیری تاریخه مال اولمش ووبوکون موجود بوتون تورك دولتلرینک عمومی آدیدر. بوضورتله قالمیدر. دیمک بودولته بوآد اولاماز یاخود بویوک بر سیاسی منفعت وعلاقه ایله بودولته تورك دولتی دینر. دیگر موجود تورکلر نظریه "کندیسنه تابع عد ایدیلیر. سیاسی جریانه بویله بر ماهیت ویریلرک فعله انقلابی کوزدیلیر. بوده بر فکر، هم مهم بر طرز اولاییلیر. فقط بوکونک طوغری سیاستی اولماسه کرک. هر نه اولورسه اولسون آوروپا بزده بوآدی ویرمکده در. دولته اوغوز دولتی یاخود تورکمن دولتی دیمک ده عقله کلیر. فی الحقیقه تورکمنلر یالکز آنادولوده دکلدر. قوزغون دکیزینک شرقده، جنوبنده، غربنده، ایرانده ده یرلی اوله رق موجوددرلر. سالجوقلی خاندانی زماننده دولتهک طور اخی بوبرلری ده احتوا ایدیوردی. بونقطه نظر دینده بوآد دوغری اولاییلیر. آنجق بوکونکی سیاسی، شرقزده کی تورکمنلرله حرثی وضعیته کوره، دولتهک کووده سنک آنادولو اولسی اعتباریله ده بوآدلر دخی سقطدر. اوغوز، تورکمن آدلری بویوک مقیاسده بررژیونالیزمده افاده ایده جکسندن تورکلک عالمنده بر تفرقه سببی ده اولاییلیر.

آنادولویه عرب وعجم، رومالیرده نسبتله، «اقلیم روم» ویا سادهجه «روم» دییورلردی. آنادولو سالجوقلی پادشاهلرینه ده بوآدی اضافه ایدرک «سلاطین روم» دیمشاردر. عجا بو دولته «دولت روم»، یکی طرزیمزله «روم دولتی»

دیه بیلیرمی یز؟ بویله برآدده خاطره کله بیلیر. معلومدرکه روم یونانی دیمک دکلدر. بیزانسی معناسه در. بوسبیله بوآد اونلری ده بو قادرویه آلاجق بر تعبیر اولایا بیلردی. فقط بوتعبیر سیاسی منفعتدن زیاده ضررلی اولوردی. روم تعبیری تورک ایچون صوک بر عصرلق، بالخاصه صوک بش اون ییلقق وقوعاتدن صوکره ایصیناماز. بر عرق آدی اولدینی کبی روملرده کنیدیله ری، یا کلس فقط فعلاً، یونانی صایبورلر. بوسبیلر بو تعبیرک قبولنده هیچ بر منطق بر اقاماشدر. بونکه برابر لوزان قونفرانسک اهلای مبادله سی مقاوله سندن صوکره بوکا لزوم ده قالماشدر. قبولی بالعکس ضرردر. ملیت افاده ایتمین و تورکلی کمزه ضربه اولاجق اولان «دولت روم» آدی اونوتدیر یالاجق و بزم ایچون بابانجی، غیر طبعی و بزه عائد اولیان برآددر.

طوپراغه نسبتله «آنادولودولتی» آدینک ویرلسی ده وارددر. فقط آنادولودده نیجه دولتلر کیش، کچمشدر. بو هانکیسی اولاجق در. وناصل آیرد ایدجکیز. کذا روم ایلی بوتعبیرده داخل دکلدر. اووقت روم ایلی مستملکه شکنده می تلقی ایدیله جک حالبوکه اوراسی تورکله مسکوندر. تورک ایله مسکون بریر مستملکه دکل، آنا وطنندن اونور. دیمک که بوده ویریه میه جک برآددر. بونی «آنادولو تورکی دولتی» شکانه صو قق ده برفکدر. فقط بوده افرادینی جامع، آغیارینی مانع برآد دکلدر. برده اوندن اوزون وغریبدر. بویله اوزون دولت آدی ده دنیاده یوقدر.

آرتق باشقه برآد خاطره کله یور. یالکیز بردانه وارددر. اوده اک مناسبدر. یعنی تورکیه، بو دولتک آدی او وقتکی مقاله مده و مجلس مبعوثان کرسی سنده سویله دیکم کبی «تورکیه» در. ذاتاً بز عثمانلی یز، دولت «دولت علیه عثمانیه» در دییه ترمز ایدوب دورور ایکن آوروپا بوتون عالم عصرلردن بری بردوزویه بزه «تورکیه!» دیه حایقیروب دورویوردی. یعنی اسکیدن بری آدمز واردی. وجهانجه معروف ایدی. بوآد یکی دکل اسکی وطبعی برآدیمزدر. همده بوآد بوتون آوروپاده کی دولت آدلری کییدر. عینی قاعده میه تابعدر. آلمانیا، آلمان؛

فرانسه ، فرانسه ؛ روسیه ، روس ؛ الخ ... مودلندرتورکیه تورکدر . بز بریره
آد قویتمق ایچین عجمجهدن « ستان » ، آوروپادن « یه ، قالینده یا » اداتلرینی
آلمشدر . کندیمزی ، هر نه آد قویسه ق ، تورکلکدن چیقارمایز . چیقارمق
عقل کاری ده دکلدر . سیاسی وخیم برضرر ، اولدیریجی برضرره درده . بو آد
دولت آدلرینک بر ترکیب ایله افاده ایدیه میوب مطلقا برکله ایله افاده اولنمی لزومه
موافقدر . ینه بو آد افرادینی جامع ، آغیارینی مانعدر .

بوردینک آدی تورکستاندر . بر قسمنک آدی آزاربایجاندر . الخ ... دولترینده
تورکستان دولتی ، آزاربایجان دولتی الخ ... دهر . تورکیه آدی ده آنادولورووم
ایلی به خاص اولور تورکیه آندده تاریخده باشقه بر تورک دولتی ده یوقدر . التباس ده
اولاماز . بوحالده دیمک ال مناسب آد تورکیه در . بونی استانبول مجلس مبعوثاننده
سویله مشدم . نته کیم آنقرده ملی حاکمیت دورده سی باشلادیغی وقت هیئت وکیل
وملت مجلسی طرفندن دولته حقیقی آدی اولان و دنیا جده طانمش بولونان « تورکیه »
آدی رسماً ویرلشدر . یعنی بومسئله بوضورتله حل ایدلشدر .

بوحالده بز لر بوبوک تورک عائله سی ایچنده « تورکیه تورکلری » یز . دولتمزک
آدی تورکیه در . « تورک تاریخی » ایچندن صرف کندیمزه مخصوص تاریخک
آدی « تورکیه تاریخی » در . یعنی تورکیه تاریخی تورک تاریخک بر جزو در .
بوندن بویله بز آنادولو وروم ایلی تورکلرینه عثمانلی تورکی دکل « تورکیه تورکی »
وبو دولته عثمانلی دکل تورکیه دنبله جکدر .

در قنور رضانور